



Samstarfssamningur Mosfellsbæjar og Ungmennafélagsins Aftureldingar

Mosfellsbær kt. 470269-5969 og Ungmennafélagið Afturelding (hér eftir nefnt UMFA) kt. 460974-0119, gera með sér svohljóðandi samstarfssamning:

1. grein

Tilgangur og markmið samningsaðila

Meginmarkmið samningsaðila er að leitast við að tryggja öflugt og fjölbreytt íþróttastarf í Mosfellsbæ.

UMFA skal hafa það að markmiði í starfsemi sinni að bjóða börnum og unglingum skipulagt íþróttastarf undir leiðsögn menntaðra og hæfra leiðbeinenda þar sem forvarnargildi íþróttar er haft að leiðarljósi. Samhliða leitast UMFA við að hlúa að keppnis- og afreksíþróttafólki þannig að það nái sem bestum árangri.

Mosfellsbær mun styðja fjárhagslegan rekstrar- og starfsgrundvöll félagsins með samkomulagi um afnot íþróttamannvirkja og beinum fjárframlögum.

2. grein

Framlög Mosfellsbæjar

Mosfellsbær skal greiða UMFA árleg fjárframlög og skal félagið ráðstafa þeim á eftirfarandi hátt til starfsemi félagsins:

31.000.000 kr. *Framlag til barna- og unglingastarfs*

Framlaginu skal verja til barna- og unglingastarfs félagsins. Því skal ráðstafað til deilda í réttu hlutfalli við iðkendafjölda miðað við greidd árgjöld undanliðið tímabil.

Framlag hvers árs tekur mið af breytingum á launavísitölu útgefinni í nóvember árið áður, auk 3% á ári til að mæta væntanlegri fjölgun iðkenda. Gera skal grein fyrir því hvernig framlaginu er varið í reglulegum skýrslum til Mosfellsbæjar.

44.000.000 kr. *Framlag til almenns reksturs*

Framlaginu er ætlað að veita deildum félagsins faglega yfirstjórn og þjónustu samhliða því að tryggja að fjárhagslegt ut anumhald sé til fyrirmyndar, með áherslu á öflugt barna- og unglingastarf. Framlaginu skal verja til daglegs reksturs, s.s. launakostnaðar auk annars kostnaðar á skrifstofu. Framlag hvers árs hækkar í samræmi við breytingu launavísitölu miðað við 1. nóvember árið áður. Gera skal grein fyrir því hvernig framlaginu er varið í reglulegum skýrslum til Mosfellsbæjar.

Framlag til sumarstarfa

Vegna sumarverkefna félagsins greiðir Mosfellsbær árlega fjárhæð sem nemur **5 stöðugildum (140 stundum á hvert stöðugildi) í launaflokki 117 samkvæmt kjarasamningi Starfsmannafélags Mosfellsbæjar**. Aðalstjórn UMFA ákveður í samvinnu við framkvæmdarstjóra félagsins hvernig fjármagninu er ráðstafað innan félagsins.

Framlag frá Vinnuskóla Mosfellsbæjar.

Á sumrin nýtur félagið starfskrafta frá Vinnuskóla Mosfellsbæjar, en sækja skal um það fyrir 1. apríl ár hvert. Á hverju árið er metin þörf félagsins til starfskrafta og geta bæjarins til að mæta óskum þess.

28.000.000 kr. *Framlag til afreksstarfsemi*

Framlaginu skal varið til að styðja við rekstur á meistaraflokkum félagsins og stuðla þannig að góðum árangri. Framlag hvers árs tekur mið af breytingum á launavísitölu útgefni í nóvember árið áður, auk 3% hækkunar á ári til að mæta væntanlegri fjölgun iðkenda. Gera skal grein fyrir hvernig framlaginu er varið í reglulegum skýrslum til Mosfellsbæjar.

Kort vegna líkamsræktar *Framlag til afreksþjálfunar*

Mosfellsbær lætur félaginu í té 150 árskort í líkamsræktarstöð í íþróttamiðstöðinni að Varmá. Markmið þessa er að tryggja sérhæfða styrktarþjálfunar fyrir afreksíþróttafólk félagsins.

2.700.000 kr. *Framlag til afreks- og styrktarsjóðs*

Framlaginu skal verja til að styðja almennt við afreksfólk innan Aftureldingar, vegna þátttöku á æfingum eða keppni með landsliði innan sérsambanda ÍSÍ. Einnig að veita þjálfurum og leiðbeinendum félagsins styrk til að efla þá í starfi. Framlag hvers árs tekur mið af breytingum á launavísitölu útgefni í nóvember árið áður, auk 3% hækkunar á ári til að mæta væntanlegri fjölgun iðkenda. Gera skal grein fyrir hvernig framlaginu er varið í reglulegum skýrslum til Mosfellsbæjar.

Mosfellsbær greiðir þann 1. júní á ári hverju **300.000 kr.** í *Minningarsjóð Guðfinnu* og skal því fjármagni sérstaklega ráðstafað til að styrkja börn af erlendum uppruna til íþróttaiðkunar innan félagsins.

Afnót af íþróttamannvirkjum

Reiknað framlag Mosfellsbæjar vegna afnota UMFA af sölum, sundlaugum og íþróttavöllum bæjarins kemur fram með upplýsingum sem verða gerðar sýnilegar á vef bæjarins sbr. 3. gr.. Upphæðin tekur breytingum milli ára í samræmi við notkun á mannvirkjum og reglulegri endurskoðun á leigukostnaði.

3. Grein Greiðslur framlaga

Framlag til barna- og unglingsstarfs, framlag til afreksstarfsemi og í afreks- og styrktarsjóð eru greidd í tveimur jöfnum greiðslum 1. janúar og 1. júní ár hvert. Greiðslur vegna framlags til almenns rekstur skulu greidd með jöfnum mánaðarlegum greiðslum. Greiðslur taka mið af breytingum á launavísitölu útgefni í nóvember árið áður, í fyrsta sinn nóvember 2021 vegna greiðslna fyrir 2022. Gera þarf grein fyrir því hvernig framlögin eru nýtt í skýrslum til Mosfellsbæjar þegar að eftir þeim er leitað. Öll framlög til félagsins verða gerð sýnileg á vef bæjarins auk árschlutauppgjöra UMFA þegar þau liggja fyrir.

Félagið skal senda Mosfellsbæ reikninga fyrir fjárframlögum skv. 2. grein. Dagsetning reiknings skal vera 1. dagur þess mánaðar sem kveðið er á um greiðslu framlagsins. Mosfellsbær áskilur sér tvær vikur til úrvinnslu reiknings áður en hann er greiddur. Reikningar eru greiddir inn á þann bankareikning félagsins sem tilgreindur er á innsendum reikningi. Félaginu er óheimilt að veðsetja eða ávísa greiðslum skv. samstarfssamningi þessum til þriðja aðila.

Árlegar greiðslufjárhæðir eru ákvarðaðar með fyrirvara um fjárheimildir í árlegri fjárhagsáætlun Mosfellsbæjar.

4. grein

Samskipti samningsaðila

Aðalstjórn UMFA annast samræmingu á starfsemi deilda félagsins og tryggir að einstakar deildir beini til aðalstjórnar erindum sínum sem stjórn metur og ber eftir atvikum upp við Mosfellsbæ.

Íþrótt- og tómstundanefnd Mosfellsbæjar kemur fram fyrir hönd Mosfellsbæjar varðandi framkvæmd samningsins.

Íþróttafulltrúi Mosfellsbæjar annast dagleg samskipti við UMFA varðandi framkvæmd samningsins. Íþróttafulltrúi boðar einu sinni í mánuði til framkvæmdafundar með formanni, íþróttastjóra og framkvæmdarstjóra UMFA, ásamt vaktstjórum íþróttamiðstöðvarinnar að Varmá.

Framkvæmdastjóri UMFA kemur fram f.h. UMFA við Mosfellsbæ varðandi dagleg samskipti og nánari framkvæmd samningsins.

Íþrótt- og tómstundanefnd fundar einu sinni á ári með fulltrúum UMFA.

5. grein

Ábyrgð aðalstjórnar UMFA

Framkvæmdastjóri félagsins, í umboði aðalstjórnar, skal bera ábyrgð á fjármálastjórn félagsins og tryggja að bókhald sé reglulega og réttilega fært og skal það liggja fyrir 31. desember ár hvert.

Allir styrkir og framlög Mosfellsbæjar greiðast til aðalstjórnar og annast framkvæmdastjóri frekari ráðstöfun greiðslna í samræmi við samþykktu rekstrar- og fjárhagsáætlun félagsins.

Aðalstjórn UMFA ber ábyrgð á skuldbindingum félagsins og tryggir að skuldbindingar deilda innan félagsins séu ávallt í samræmi við skráðar áætlanir og samþykktir aðalstjórnar. Aðrar skuldbindingar sem einstakar deildir kunna að gera án skriflegrar heimildar eða samþykktar aðalstjórnar eru á ábyrgð þeirra sem til þeirra stofna. Aðalstjórn ber ábyrgð á því að kynna formönnum deilda þessa þætti.

Samkomulag er um að deildir leitist við að hækka ekki æfingagjöld sín umfram hækkun launavísitölu á samningstímanum.

6. grein

Upplýsingaskylda UMFA

Aðalstjórn UMFA ber ábyrgð á rekstri félagsins og skuldbindur sig til að leggja fram gögn um fjárhagsleg málefni félagsins hverju sinni þegar eftir því er leitað að hálfu fulltrúa Mosfellsbæjar.

Aðalstjórn UMFA skal leggja fram starfs- og fjárhagsáætlun sem nær til allra deilda félagsins fyrir næsta starfsár eigi síðar en 31. desember ár hvert. Í áætlunum skal aðgreina rekstur barna- og unglíngastarfs, almennan rekstur og rekstur meistaraflokka.

Samráðshópur Mosfellsbæjar og Aðalstjórnar UMFA skal hittast í maí og nóvember ár hvert til að ræða málefni UMFA og framvindu samstarfsins. Þar skal farið yfir fjárhagslega stöðu, nýjustu uppgjör og yfirlit yfir þróun iðkenda fjölda.

Aðalstjórn UMFA skal leggja fram 6 og 12 mánaða uppgjör ásamt árskýrslu innan 30 daga frá lokum uppgjörs. Mosfellsbær getur einhliða ákveðið að stöðva greiðslur skv. 2. gr. sé uppgjörum

ekki skilað. Í uppgjörum skulu koma fram upplýsingar um stöðu tímabils og rekstraráætlun með samanburði við fyrra tímabil.

Gögnin verða hluti upplýsinga sem birtar verða á vef bæjarins um hvernig fjármunum sveitarfélagsins er varið.

Upplýsingar um ráðstöfun framlaga Mosfellsbæjar til einstakra deilda í samræmi við samþykkt aðalstjórnar skulu ávallt liggja fyrir samhliða uppgjöri.

7. grein

Ákvæði um afmörkuð samstarfsverkefni

Lögð er rík áhersla á að hver deild félagsins sé áfram viðurkennd sem fyrirmyndarfélag og mæti kröfum um endurnýjun, auk þess sem handbækur deilda sé aðgengileg á vef félagsins.

Mosfellsbær áskilur sér rétt til að skilyrða allar fjárveitingar til íþrótta- og tómsfundafélaga, að þau setji sér siðareglur, viðbragðs- og aðgerðaráætlun í tengslum við þær og skulu félögin fræða starfsfólk sitt um kynferðislega áreitni/ofbeldi og hvers konar annað ofbeldi. Einnig skal félagið stofna og/eða hafa aðgang að óháðu fagráði sem tekur á mótum ábendingum og kvörtunum iðkenda og ábyrgðaraðila. Félögin skulu sýna fram á að farið sé eftir jafnréttisáætlunum og jafnréttislögum í starfi og aðgerðaráætlun þar sé skýr. Hafi félagið ekki gert jafnréttisáætlun með aðgerðaráætlun skal það gert.

8. grein

Endurskoðunarákvæði og gildistími


Samningurinn gildir frá 01.01.2022 til 31.12.2024 og fellur þá úr gildi án uppsagnar. Verði meiriháttar breytingar á forsendum fyrir rekstri Aftureldingar á samningstímabilinu getur félagið óskað eftir viðræðum við Mosfellsbæ. Fyrir 1. júní 2024 skulu samningsaðilar endurskoða samninginn með það að markmiði að nýr samningur taki gildi í upphafi árs 2025

Mosfellsbær 5. apríl 2022

Fh. Mosfellsbæjar


Haraldur Sverrisson
bæjarstjóri

Fh. UMFA


Birna Kristín Jónsdóttir
formaður